

Noticia
Transparente
di Gobierno

ISLA ONLINE

Diamars 6 Augustus 2024

Email: IslaOnline@gobierno.aw Tel: 528-4952



ARTE DI MURAYA
SAN NICOLAS



STABILIDAD
Y
PROSPERIDAD

2 0 2 4

Gabinete Wever-Croes



PROME MINISTER A ATENDE EXPOSICION 'KINDERKUNST IN 3D: FROM DESIGN TO CREATION'

Arte 3D ta un dimension vibrante unda e creatividad no tin limite y ta aporta na educacion artistico di e alumno



Dialuna atardi, 5 di augustus, Prome Minister Evelyn Wever-Croes a atende un exposicion di arte hopi special. A trata di e obranan espectacular den e dimension di 3D di muchanan entre 9 y 13 aña.

Durante e ultimo tres lunanan Pieter Verduijn di Makerpedia a duna un curso di Arte den 3D na muchanan entre 9 y 13 aña: 'Kinderkunst in 3D'. E exposicion final ta e celebracion di e biahe di e alumnonan y un showcase di nan trabou increibel. E resultado ta un exposicion impresionante di creacion imprimi den 3D. Prome Minister tawatin e placer di conecta cu e talentoso artistanan hoben tras di e proyectonan, y a keda sumamente impresiona cu nan talento y creatividad.

Educacion artistico desde hoben, ta forma mentenan flexibel, ta fomenta aspectonan fundamental den desaroyo di un mucha y ta conduci na su crecimiento personal. E ta stimula pensamentonan original y ta laga e mucha expresa su emocionnan a traves di arte.

Arte 3D ta un dimension vibrante unda e creatividad no tin limite y asina ta aporta na educacion artistico di e mucha. E ta consisti den siña e alumnonan crea, compronde y aprecia obranan di arte tri-dimensional. E ta bay mas leu di un simpel dibuho of pintura tradicional y ta inclui escultura, ceramica, e modelo digital y animacion entre otro. E ta haci bo mira e arte



como algo experimental y interactivo. E Arte 3D ta birando un parti esencial di e enseñanza den henter mundo.

Prome Minister:

"Un proyecto bunita cu ta inculca den nos muchanan desde hoben pa brasa arte y tecnologia a traves di innovacion. Arte ta lanta nan creatividad y autoestima y ta laga nan sinti cu kico cu nan pone nan mente na dj'e nan por construi. Mi ta felicita Pieter y Tess cu un proyecto asina bunita. Tambe mi ta gradici Prins Bernhard Cultuurfonds, UNOCA Aruba y Setar pa nan aporte na e proyecto. Y sigur, mi palabranan di gradicimento di curason na e mayornan pa inverti e tempo y laga nan yiunan participa. Un pabien grandi na nos innovadornan hoben cu nos tin na Aruba pa e bunita obranan cu nan a expone".



Prome Minister Evelyn Wever-Croes:

MIEMBRO NOBO PA ARUBA DEN E COLEGIO DI SUPERVISION FINANCIERO PA ARUBA (CAFT) A REUNI CU PROME MINISTER

Diamars mainta, 6 di augustus, Prome Minister Evelyn Wever-Croes hunto cu colega Minister di Finansa, Xiomara Maduro a reuni cu señor Marion Agunbero ken ta e miembro nobo pa Aruba den e Colegio di Supervision Financiero pa Aruba (CAft). Presente pa e reunion tambe tawata e miembro saliente, señora Hellen van der Wal.

Desde 1 di augustus 2024, señor Marion Agunbero ta e miembro nobo pa Aruba den e Colegio di Supervision Financiero pa Aruba (CAft). Consejo di Minister di Reino a aproba riba dia 21 di juni 2024 e proposicion di Aruba pa nombra señor Agunbero como e miembro nobo. Señor Agunbero ta un persona cu hopi experiencia tanto na Departamento di Finanzas y na Banco Central y el a traha den Raad van Advies y cu fondo di pensioen entre otro. E ta un persona cu hopi conocimiento y cu awor ta dedica su tempo como e miembro nobo pa Aruba den CAft.

Prome Minister ta remarca cu e miembro saliente, señora van der Wal a sirbi pais Aruba durante dos periodo pa un total di 6 aña durante temporadanan hopi dificil. Tempo señora van der Wal a inicia cu su trabou, ya Gobierno a cuminsa pone orden den e situacion financiero di Aruba creando surplus, pero net e tempo ey a bin e pandemia di Covid19, y cu esey a bin masha hopi polemica cu CAft. Prome Minister ta hopi agradecido na señora van der Wal pa e servicio cu el a duna na pais Aruba den CAft. A traves di su persona por a trece e perspectiva di Aruba dilanti den tur e discusionnan cu CAft. No ta tur ora e tawata di acuerdo cu CAft y semper a expresa esaki, pero si semper el a mantene un relacion transparente cu Gobierno di Aruba sin cu Gobierno a interveni den su trabou di supervision.

Den number di Gobierno di Aruba, Prome Minister ta gradici señora Hellen van der Wal pa su trabou durante e 6 añanan, y ta desea señor Marion Agunbero hopi exito den e periodo su dilanti. ■■■





A REUNI CU SINDICATO DI TOPA Y DPS PA TRATA DIFERENTE PUNTO IMPORTANTE, EN CONEXION CU EMPLEADONAN DI COLEGIO EPI



Recientemente, Minister di Enseñansa y Deporte Endy Croes a reuni cu sindicato TOPA, esta presidente Sr. Alonso Tromp, vice-presidente Sr. Axel Figaroa y Sr. Roderick Lee. Ademas di esaki, Sra. Morela Dirkz y Sra. Miguelina Flores di Dienst Publieke Scholen (DPS) tambe tabata presente den e ocasion aki. Durante e reunion, Minister Endy Croes a scucha diferente punto en conexion cu Colegio EPI.

Varios docente y/of empleado cu falta MB of cu tin varios aña trahando riba un basis contract. Den e cuadro aki, TOPA representando e docente- y empleadonan di Colegio EPI, a trece nan puntonan dilanti. Minister Endy Croes y DPS a tuma nota di e puntonan aki y lo bay trata nan pa brinda atencion na e inquietud di e docente y- empleadonan di Colegio EPI. Fuera di esaki, Ministerio di Enseñansa a splica TOPA tocante e cambionan grandi cu Colegio EPI ta traspasando aden desde aña 2022, en conexion cu innovacion di ocho (8) estudio (opleiding).



Durante e reunion a splica cu si no pasa den e proceso di renobacion di e estudionan aki, den futuro e diploma di Colegio EPI no lo wordo reconoci. E mandatario di Enseñansa a enfatisa cu e procesonan aki ta tuma basta tempo. Finalmente, Minister Endy Croes a indica cu lo atende e peticionnan di e empleadonan y dentro di algun siman lo bolbe reuni pa mira e avancen. Finalmente, Minister Endy Croes gradici e sindicato TOPA pa e trabou cu nan ta haciendo y e docente- y empleadonan di Colegio EPI pa nan pasenshi. ■■■

MINISTER ENDY CROES TA DESEA E DI DOS GRUPO DI 61 STUDIANTENAN CU A SALI PA HULANDA HOPI EXITO

E di dos grupo cu ta consisti di 61 estudiante a sali dialuna anochi rumbo pa Hulanda pa continua cu nan estudio riba nivel di enseñansa avansa, HBO y universidad. Ta trata aki di e studiantenan cu ta bay biba na Breda, Delft, Den Haag, Eindhoven, Gouda, Groningen, Leeuwarden y Leiden. Famia y amigonan tabata presente na Aeropuerto Internacional Reina Beatrix pa desea nan ser keri un bon biahe y exito den nan siguiente etapa di bida. E mandatario di Enseñansa y Deporte tambe tabata presente na e ocasion aki pa despedi y yama ayo na e studiantenan cu ta saliendo rumbo pa Hulanda pa sigui estudio avansa.

“Como gobierno, nos ta duna e sosten moral, motiva y inspira nos studiantenan y ta pa e rason ey nos ta na aeropuerto,” Minister Endy Croes a indica.

“Nos sa cu e mayonan ta keda tristo atras, paso awe ta e dia cu nan ta habri nan hala y laga nan yiu sigui riba nan mes, pero sigur pa un bon porvenir. Alabes, ta desea e studiantenan tur clase di exito y ohala ora nan termina nan estudio nan por bin Aruba bek y yuda nos sigui desaroya y engrandece e pida baranca Aruba. Haci boso best. Nos ta keda en espera di boso. Hopi exito!,” Minister Endy Croes a expresa.

Sra. Gina de Kort, directora suplente di Departamento di Enseñansa Aruba (DEA) a expresa cu awe nos ta barca e di dos grupo cu ta bayendo Hulanda den e vuelo organisa pa Departamento di Enseñansa. “Despues di e trabounan duro di nos coleganan di Studiefaciliteiten, awe nos ta desea e studiantenan hopi exito y perserverancia cu nan estudio na Hulanda. Nos ta spera cu tur estudiante sea si ta bay cu Arubalening of riba nan mes pa studia, duna tur di nan banda y sa di busca otro ora cu tin mester. Alabes, ta recorda e studiantenan cu na Hulanda Cas di Aruba ta na boso servicio y semper nan por conta cu nos. Tuma contacto y busca bo informacion si bo tin mester. Exito y forsa na e famia cu a keda atras un poco tristo, pero corda cu nan ta bay cu un meta Hulanda. Nos mester stimula nan y yuda nan pa cumpli nan meta, Sra. de Kort a subraya.

Sra. Marylin Feliciano, kende ta Marketing & Communications Mangers di AAA, a expresa cu den nomber di AAA cu nan ta orguyoso pa wak un otro grupo di estudiante biahando pa Hulanda pa sigui nan soño y ta desea nan hopi exito. “Sky is the limit”. Haci boso best y nos ta warda boso bek na cas. Na final di e ceremonia, AAA y Ministerio di Enseñansa a brinda e studiantenan un obsekio. Minister Endy Croes ta gradici Sra. Sharine Croes - Dubero di Seccion Studiefaciliteiten, Sra. Marilyn Feliciano y team di marketing di AAA pa nan excelente trabou. Pa conclui, Minister Endy Croes ta desea e studiantenan tur clase di exito cu nan estudio den exterior. Pa boso regresa Aruba bek dentro di algun aña cu boso diploma, conocimiento y experiencia. ■■■



MINISTER ENDY CROES Y PRESIDENTE DI ABBA SR. KEVIN JAMES A ELABORA RIBA DIFERENTE PROYECTO DEPORTIVO



Recientemente, Minister di Enseñansa y Deporte Endy Croes a reuni cu Sr. Kevin James, kende ta presidente di Amateur Baseball Bond Aruba (ABBA), cual ta maneha e federacion di baseball na Aruba. Durante e encuentro aki, Sr. James a duna informacion di avancen di e campeonato local cu lo tuma luga na Aruba e aña aki den e luna di november y a pidi Gobierno di Aruba algun ayudo adicional pa esaki. Tambe Sr. James a presenta su vision pa futuro, en conexion cu un proyecto cu un compania internacional y a pidi sosten di Gobierno di Aruba pa e proyecto aki. E mandatario di Deporte a indica cu sigur lo bay amplia riba esaki e lunanan nos dilanti.

Ademas, Sr. James a indica cu e tin deseo di inicia cu Proline League pa e deporte di softball, mescos cu Proline Baseball League cu ta tuma luga den e luna di november na Aruba. Ministerio di Deporte tin deseo di yega tambe na mesun tipo di proline pa volleyball y basketball. Tin un patronisado internacional cu durante dos (2) aña caba a patronisa uniform pa Proline Baseball League y Sr. James ta desea di engrandece esaki pa mas deporte aki na

Aruba. Pa finalisa, Minister Endy Croes a indica cu lo keda den contacto estrecho cu Sr. James y Gobierno di Aruba sigur lo sostene y guia e gran proyecto deportivonan aki.

SINTONISA

CONFERENCIA DI PRENSA DI GOBIERNO DI ARUBA

Gabinete Wever-Croes

DIALUNA Y DIAHUEBS | 10:00 AM

GABINETE DI ARUBA A RICIBI DI DOS GRUPO DI STUDIAntenAN CU A YEGA HULANDA



Un total di 60 estudiante a yega awe 6 di Augustus cu vuelo 765 di KLM. Nan ta forma e di dos grupo di estudiante Arubano cu a bin Hulanda e aña aki pa sigi un estudio avansa na nivel di HBO of Universidad na Hulanda. E grupo di estudiante aki lo bai studia na e ciudadnan di Breda, Eindhoven, Delft, Den Haag, Leiden, Groningen y Leeuwarden.

Na Schiphol e studiantenan mescos cu tabata e caso di ayera a wordo saluda pa Minister Plenipotenciario mr. Ady Thijsen y director di Gabinete di Aruba Joselin Croes LL.M. Un biaha mas tabata tin un delegacion consistiendo di functionarionan di Departamento di Enseñansa, Bienestar General y Cultura di Gabinete di Aruba, studiementor y miembronan di e POC (Plaatselijke Opvangcommissie) presente den sala di yegada di Schiphol.

Despues cu e grupo di estudiante a sali cu nan maleta, na un forma bon coordina y organisa a haya instruccion di personal di Gabinete di Aruba, mentor y miembronan di e POC con pa cana y unda nan mester a para den grupo pa warda nan turno pa bai na e bus cu lo hiba nan na nan ciudad.

Mescos cu ayera Robby Schouten di e programa Leu foi Cas tabata tey atrobe pa haci entrevistanan entre otro cu e studiantenan.

Mayan e grupo di studiantenan aki lo cuminsa cu e programa di “opvang” obligatorio, cual lo dura entre tres dia y un siman. Durante e dianan aki e studiantenan nobo lo haya e guia nesesario den nan ciudad unda pa sigur cuater aña of mas nan lo biba y studia.

E prome aña e estudiante ta ricibi guia di e studiementor, pero pa e resto di su estudio e ta cai bou di Gabinete di Aruba.

Riba Facebook y Instagram di Gabinete di Aruba y Facebook di Onderwijszaken lo tin reportahe y potretnan di e yegada di e grupo di studiantenan. ■■■■



GABINETE DI ARUBA TA ENTREGA "HANDBOEK VOOR ARUBAANSE STUDENTEN IN NEDERLAND" NA TUR STUDIANTEN CU A CABA DI YEGA HULANDA



Minister di Educashon y Deporte y Indhira Burke di Gabinete di Aruba. E "handbook" ta consisti di 5 capitulo.

E prome ta splica tocante di Gabinete, relacion den Reino y Statuut di Reino Hulandes, di dos ta elabora riba biba, studia y traha na Aruba, di tres capitulo ta encera biba, studia y traha na Hulanda, seguro na Hulanda y un seccion Q&A. Dia 5 y 6 di Augustus e "handbook" aki a wordo parti por medio di un QR code na tur estudiante cu a yega Hulanda. Directora di Gabinete di Aruba Joselin Croes LL.M ta invita tur mayor, tur decanonan, estudiante of tur persona cu ta guia studiantenan pa tuma nota di e contenido di e handbook aki pa ta na altura di tur e cambionan cu Hulanda a introduci pa nos studiantenan. Boso por click riba e QR code cual boso por haya riba e website di Gabinete riba www.kabinetaruba.nl.

Cu esaki Gabinete di Aruba ta cumpli cu su tarea di informa tur estudiante debidamente relaciona cu tur loke nan por spera ora nan bin studia na Hulanda.

Na cuminsamento di aña Gabinete di Aruba a tene un encuesta bou di tur estudiante di Aruba na Hulanda. For di e encuesta a sali na cla cu nos studiantenan ta sinti cu nan falta hopi informacion for di prome cu nan bin Hulanda caba, pero tambe riba con pa studia, biba y traha na Hulanda.

Nan a indica di tin falta di informacion tocante di seguro, prestamo di DUO, OV-kaart, fianza di studio, inscripcion na Gemeente, tips di con pa gasta menos na Hulanda, tips con pa haya ayudo di nan scol y nan decanonan, con pa busca cas etc. Banda di esaki nan tabata kier sa over di e relacion di Aruba den Reino y tocante di Statuut di Reino Hulandes encaso cu otro estudiante puntra nan. Otro pregunta ta kico Gabinete y e mentornan ta hasi y con nan por contact e estudiante.

A base di e resultado di e encuesta y loke e studiantenan a indica cu nan lo kier haya na informacion, Gabinete a cuminsa compila un "handbook" cu tur informacion relevante pa tur estudiante cu ta bin of kier bin studia na Hulanda. E la tuma cuater luna pa finalisa danki na e gran colaboracion entre Gilner Dirksen di bureau di



2024

AÑA DI STABILIDAD Y PROSPERIDAD



Gabinete Wever-Croes

Arte di Muraya ta un expresion di creatividad sin limite cu ta transforma murayanan di San Nicolas den un galeria bibo cu ta conta historia, transmit emocion y tambe ta stimula e orguyo di un comunidad.

